



Kiribati Catholic Charismatic Renewal Service

Emmanuera

Te Atua i buakora

Volume 1, Issue 2


KCCRS Newsletter

Thursday, 01 October, 2009

Kanoana

<i>Te Kamauri</i>	1
<i>Kaongora mai iroumi</i>	2
<i>Moan Tein Charism..</i>	4
<i>Kaongora man NSC</i>	5
<i>Ana Tangira Te Uea</i>	8
<i>Te Maiu ae tabu</i>	16

Te Kamauri



Mauri n Ana Tangira te Uea,

Ti uaia ni karaba te Uea ngkai E a tia ni kateimatoa ana baintangira ae kakawaki nakoira ni kabane ae bon Emmanuera - Te Atua i Buakora. Ti kakoaua ba manga otinakon naba Emmanuera n te tai aio bon kaotan ara kekeiaki ae tamaroa ngaira kain te charismatic i Kiribati ao i aonaba ni kan karokoa ana Tangrira ma ana Nanoanga te Uea nakoia aomata ni bane.

E raba te Uea ibukin te Bentekota ae boou ae E a manga anganira are ti kakoaua iai aron kakamakurin te Tamnei ae Raoiroi i buakora ao i aon abara ae Kiribati. Ti kakoaua naba ba man kakamakurin te Tamnei ae Raoiroi aio ao E manga reitaki ara kona ni kabuta te rongorongo ae raioiroi, tiaki ti inanon Emmanuera ma inanon naba ara website ae boou are te Kiribati Catholic Charismatic Renewal Service (kccrs.org.ki).

Ti karabaia ni kabane ake a tia ni

katauraoa kananom Emmanuera n te tai aio ake a na manga reke ba kawain te kamaiu ma te karaoiroaki nakoia tarira ma manera inanon te Uea. Man rakan tibatiba aika a rangi ni katekenano ao inanon taian karaki ma reirei aika a katauraoaki ao bon ana tataro Emmanuera ba a na maiti taian tibanga ma kamaeuaki aika a na reke.

Bon ana karautaeka naba Emmanuera ibukin taian bitaki ma kuarerereke ake a tia ni karaaoaki iaon tabeua kanoa ake a roko. Bon te kantaninga ba a na bon oti n aroia ni banin ao n aki bitaki n te website.

Ana bubuti Emmanuera nakoira n te tai aio ba ti na kataia ni karikirakea ao ni kananova makan te riki n ti teuana (power of unity) inanon ara botaki ni charismatic. Aio bon uan ana karea te Tamnei ae Raoiroi ae moani baan te kakawaki ao are ti mamaneweia n taai nako ni kaukan ara nebonebo. Korakorara ni maiura aio ni karaoi tabera nako bon ti inanon te riki n ti teuana ma te Atua ao ma tarira ao manera ni kabane. Ao bon ti te Tamnei ae Raoiroi Ngaia te tia anganira te katiteuanaki. Ti na kamauna te kairiribai, ti na karekea te kaiokaki ni koaua ma tarira ao manera, ao ti na tauraoi ni babaina te i kaka-barabure.

Ara tataro ba inanon warekan Emmanuera aio ao a na baro ao man raanga iaora ni kabane ana Karatia ma ana Karaoiroi te Atua ae Tamara ni koaua.

Tamnei tabeua n tain te website launching i Tarawa ao i Suva



Aia launching leaders iaon Tarawa

Aia launching kaain St Padre Pio, Suva



www.kccrs.org.ki

Kiribati Catholic
Charismatic Renewal
Service

Ibukin am rongorongo, taiaoaka reitaki ma Uriam Timiti, Beneteta Raobati ao Kautoa Tonganibela.

Phone: + 679 3385364
E-mail: tmiti_u@usp.ac.fj;
bene_raobati@yahoo.com.au
kautoat@yahoo.com



Kaongora mai Irouumi

Ribooti mai Tarawa Teinainano ao Betio

Charismatic Renewal, Teaoraereke Parish

Imwin te Bentekota ae nako ao te Charismatic Renewal man te Parish mai Teaoraereke e a bon tia naba ni waaki ma kain ana taibora aika a boou.

Man te taibora ae banin ao aio araia kain aon ana taibora:- Te Tiibi Riita bon Tiaon Tirae, te Kauoman Tiibi Riita bon Nei Meeta Eriuta, te Tia Koroboki bon Blite Marontau ao te Tia Mane bon Mangarita Mikaere.

Mai Bairiki ao aikai kain aia taibora, te Riita bon Mwetaake Kauabaga, ao ana kauoman ae Katarina Keko. Mai Natari ao are e reke ba te Riita bon Tebitaa Kabure ao ana kauoman ae Teakoua Tiaon. Man St. Teretia Iesu Tetei man te Tetaobe te Riita iai bon Maria Tiaon. Man te Ran ni Kamaeu i Abaunamou, Nei Veronica Reken ba te Riita ao Teretia Teangabure ba ana kauoman. Mai lerutarem ae Boou. E rineaki Ruaia Mckenzie ba te Riita ao Nei Momoua letera ba ana kauoman.

Charismatic Renewal, Betio Parish

Imwin te bentekota ae nako, ao bon iai namakinan te kakamakuri ae reke i aon Betio n noran manga reken te marurung ni manga utiia kaina aika a tia ni matenako, ao n reitaki naba ma aika a boou ake a manga reke riniia n te botaki.

A karaoa aia rinerine kain Betio imwiin te Bentekota ao aikai aia riita

Tiibi riita: Riwata

Kauoman Utimawa (makuri ngkoateuaio i Kiritimati n te tabo n ununiki ke ni mannnikaba ao e a retire ngkai)

Tia Koroboki Tearaa

Tia Mwane: Tebwea

Maitin kurubu ngkai aika a maiu bon 5 - St Rabae ma aia riita ae Nei Tearaa, Itonimarawa ao aia riita ae Kautoa, ao Nei Rokoraoi, Tirotaam Teeti ao aia Riita ae Nei Riano (e mwauku) ao Nei Tebwea, ao Temakin group ma aia riita ae Utimawa ao ai Te Rooti ae Kamimii ma aia riita aika Nei Marao, ao Nei Mangarita.

Tiaki ngkai aron marurungin te roronrikirake ao iai manga iaongoakin kamaiuakin te group irouia te roronrikirake. E bon teimatoa naba kakawarakia aoraki i Temanoku Hospital (Betio) ao ni mwenga ake a tangiraki iai, ao ai kawarakia bure ni katoa Kaonobong n te aoa 2 pm rikaaki. Bon iai te tiim ibukin kawaraia

buure ma temanna aia riita iai, ao kawaraia aoraki a bon bane n ibuobuoki iai riita ni kabane n ikotaki ma ake a kan reita te tataro ma aoraki. E kakaraoaki aio imwiin te tutia ni katoa Moanibong n te wiki koraki.

E noraki manga maiun te tataro ngkai ni katoa Taabati koraki imwiin te tutia, ao e kabubutaki taina ba i Temakin ngkai ao n te wiiki ke te Tabati ao are imwiina ao e a manga booaki i Takoronga. A maiti ake a rereita te tataro n nebonebo imwin te tutia koraki imwiin kakatanoatakina n te umantabu irouia katekiti n tabwena aika Temakin ao Takoronga n tain te tutia ke imwain bwaran te tutia.

Iai te katekiti are e a tia ni muiookoaki bwa te tia tararua te Charismatic iaon Betio iron taman te parish ae Katekiti ba Mwao. E aki toki n irira te waaki n tabetai irarikin tabena aika a maiti n te parish ao ana makoro.



Te katautau ni maitia kain te botaki iaon Betio e nakon 30 tabun ni waerake, ao maitia kain kurubu e katatauaki nakon kaka niman nakon itiman (5-7) n te kurubu. Aikai ake a bon marurung man kakaraoa aia 15 ni miniti man iriira te wawaki, n aki warekia ake a boou aika a tiba manga kekeiaki n rin te botaki.

Raititin ana Bukamaru St Padre Pio n ana Toa Tinara Nei Maria Te Baretenia ao kaukan te website

Aritita Tekaieti, St Padre Pio, Suva

Te bong ae 15 iai bongin Aokati 2009, bon te bong are a rinea kain St Padre Pio ba e na bukamaruaki iai ana toa Tinara Nei Maria ibukin uotakirakena nako Karawa.

Kanoan te bong anne bon katauraaoan Tinara Nei Maria, te tabo ibukin te Tutia ao te kakao nakoia ara koraki ibukin reitan te bukamaru.

Te Korona

E waaki kanoana ma te korona nakon Tinara Nei Maria ngkai bon ngaia ae ana bong, ti waaki inanon te miterio ni mimitong ao ni bubuti nakon Tinara ae karineaki ibukin kanakoraoan ana baintangira nakoina te charismatic renewal hi Kiribati n ana tai aei are bon te website ibukin reitan ao kabutan te Rongorongo ae Raoiroi.

Ni motina raoi ao e a katauraoi te koraki imain te tutia

Te Tutia

E rabwa te Atua ibukin ana berebitero ae te tama Martin Everi (MSC) are ngaia ae e

Karaoa ara tutia. Te tutia aio bon ara neboneyo nakon te Atua ibukin kakamakurin Tamneina ae Raoiroi ae kona ni kairirira ibukin katauraaoan reitan kabutan Ueana rinanon rabakau ao anga ni itoman aika a boou (new technology).

Tinara ae Nei Maria, ae bon ana toa aio ni uotakirakena, bon Ngaia are e na riki ba kanga ara satellite, ngkai bon te Tina ae nanoanga man akoi are e na bubutimaai kainnano ao man katomaira ma Natina ao ni katomaira naba ma iteran nako te aonnaba ni karokoa iai te Rongorongo ae Raoiroi n taabo ake a kainanoaki mai iai.

TE LAUNCHING N TE WEBSITE

Ngke e a bara te tutia ao e a katau-raoaki te website ike e a anga ana karaorioi iai te tama nakon te waaki ao taan katauraoia. Iai teuana makoron ana taeka ae kangai **"E na riki te website aio ba reitan tataekin an o kabutaan te Rongorongo ae Raoiroi nakoia aomata nako n taabo ake a mena iai."**

E a uki ao e a tauraoi ngkai te website aio are te Kiribati Catholic Charismatic Renewal Service (KCCRS) <http://www.kccrs.org.ki>, ibukin te kakaongora, te itoman ao a bati riki ibukira ngaira kiritian ao aomata ni kabane ake a kan neweaba man karekei tibangaia mai iai.

Te botaki n kukurei

Irua n ara botaki bon ara tama aika Martin Everi, Joseph Kanimea, parish priests man St Agnes Parish aika te Fr Tamati ae te I-Samoa ao Fr Tony ae te I-Ireland ao kain te parish council temmana. Bon raora naba ara tiina man OLSH aika a maeka I Nabua, tabeman taari ao te rikan Simon ao ai bon ara koraki ni kabane. E waaki te amarake ao ai bon te moi ni maroro ike e a reke iai aia tai tarira ma manera tabeman n tibatiba ana Tangira te Uea. E nakoraoi kanoan te bong anne ao E RABWA TE UEA.



Karakin Moan Tein te Charismatic Renewal i Kiribati

Moan Tein te Charismatic i Maiana

E raweaki ao ni koreaki te karaki iroun Motie Borerei Beine mairoun te unaine ae Nei Tetaobe

Aio bon te kateniua (3) ni mananga imwiin manangaia tabeman ake a nako Kuria ma Aranuka ao Tarawa. Kuria ma Aranuka bon te moan mananga ao Tarawa bon te kauoua ao ai te kateniua ae e karaaoaki ba te nako Maiana. Aio naba are e nako mai iaan ana baire te Tama Hegglin. Ni manangaia aio, ao a bon kakaokoro taan uota te Rongorongo ae Raoiroi inanon ana Tangira te Uea. Ake a karaoa kanoan te nako Kuria ma Aranuka a muikoaki iai Teema ao Toanuea ao e bon raonia te Tama n te tai anne. Naake taan nako Tarawa bon tangaia Atanibora, tangaia Berekeman ao ai tangaia Kanere. Ao ake a nako Maiana bon Tetaobe, Teema ao Miiraa.

N rokoia kain te tiim i Maiana ao a bon ataia ba te tabo are a na kawaria e matoatoa ba a korakora bain riaboro iaona. Ngke a roko ao a boni butimaeaki ni katokaaki iaon baoia te kaa irouia mitinare. N tokaa iaon te kaa ao a boo nanoia ba a na katoka aia barengaru are bon te Rotario.

Ngke a roko iaon Tebiauea ao e a karaaoaki te boowi irouia kain te Charismatic ma mitinare ao e moti ba e na moanaki te waaki mai Bubutei. Inanon rokoia i Bubutei ao a kairaki nakon maneaban te Aro ni Katorika ikekei. A bon reita aia tataro Nei Tetaobe ma Nei Miira n rinia n te maneaba. Ao teuare Teema ngke e rin n te maneaba ao e a bon roko naba ni matu. Ma ai bon te kubanako terana irouna ngke e a bon kiro ao e a bon nora naba te wii ae bubura ba e a ruo nako aona ba e nang kabautia. E kiba man tei-rike ao n takarua ao a bon ongo raona akekei banana n kangai "ti butiko te Uea ae IESU ba ko na kabaeia tamnei aika buakaka ian am Kaibang-gaki". A uaia n tataro ni katoka bai iaon raoia aei ni karokoa ae e reke ae raoiroi.

N te tairiki anne ao a karaoa aia kababara ao a taekina aron moan kaainakin te botaki ae te Charismatic irouia ma ni kaoti naba bitaki inanon maiuia ni karaoa ao ni kateimatoa tabeia i bon irouia ni kateniman n aron te kan nenebonebo, te kan kakaraoa te 15 ni miniti ao man korakora naba tangiran te Uea are a noria n te botaki ni charismatic.

Inanon tain te maroro ao akeia ba e a roko te rongorongo ba a kainanoaki n te bong anne nakon te aoraki ae Nei Tekenna. Aorakin Neiei ai bon te mate ba iraua te miniti ao eikeike ao tabeua te miniti ao e a manga aki ikeike. Imwina ao e a taetae Teema nakon Iesu ao e taku "Iesu ane Ko a bon ongo te rongorongo ma



*"N rokoia kain te tiim
i Maiana ao a bon
ataia ba te tabo are a
na kawaria e matoatoa
ba a korakora bain
riaboro iaona"*



*"Ngke a waakina aia
katokabai inanon naba
te tai arei ao unimane
are ai bon ..."*

tia butiko ba ko na rimoara ba ngaira tia mananga nakon te 6.00 n te ingabong, ba are ti tabe moa ma am aomata aikai".

A mananga nakon Nei Tekenna n te ingabong are imuina ao ngke a roko ikekei ao a noria ba Nei Tekenna kanga e a bon mate ba e a anaanaa ikena. E bon wene Nei Tekenna ma akean ataan te bai teuana, ma aitii maiun rabatana ngkana e ike teutana imwin iraua te miniti. A bon rotan ana koraki ni kabane ao ai moarara riki tibuna are e a tobaia man tangtangi iaona ae Ten Teken ae natin Nei Teuea ma Tiare. A aki anga aia tai ba are a karaoa naba aia tataro ni katokabai iaona. Tao e bon nakon ae teitera n aoa manuin aia tataro ao kanga inanon are e nang moti aia tataro ao a anaa ana tataro Nei Maria. Inanon aia tataro nakon tinaia Nei Maria ao e a teirake naba n tekateka ao e taetae aia aoraki. A rangin n tiraua aomata ake a kokoaua te bai ae riki ba bon ana koraki Nei Tekenna ao ai bon taani matak. Inanon teiraken Nei Tekenna ao e a taku nakoia ana koraki "A tia n reke aroia naka?" N te tai anne ao a bon mii ana koraki ba akea te kaantinga irouia ba e na riki aio. A aki te roko ni kaeka ana koraki ba a bon tei ni mimi n te aekaki aei, ao a kubanako ba e nang kanga naba n taetae n aron aei ngkai e a bon maan ni wene ba ai bon te mate. Ti teuana te taeka are nako mai rouia te koraki n norakin ana kamimi te Uea aei ba te taeka ae kangai "E aera naba!!!"

N okiia nakai imwiin aia makuri ni kamauan te Nei Tekenna ao a karaoa aia kooti ba ai kanoan aia moan wiki n reirei iaon te Maiu ae Onraken te Maiu.



N te bong naba are imwiina ao ai kaeen te kawa Raweai. A uotaki aia bai n te kaa ao nagaia a karaoa kawain te kaibangaki n rianna inanon te kaawa. N rokoia i Raveai ao a kababarbara aroia iaon Bubutei ao bon ti te arona naba aia makuri n ibuobuoki ma kanga e tara n ae e bebete kanakoia riaboro.

Ao n te bong are imwiina ao a manga nako Tebiauea, ao bon titebo naba aia waaki ma are a karaoria iaoni kawaia n aron ae a karaoa naba aia kawai ni kaibangaki. N rokoia i Tebiauea ao a bon tatanninga unimane n te maneaba ma a aikoa moaniwaeia ma a kawara moa te umantabu ao imwiina a na manga nakon te maneaba. Ma inanon aia tai n tataro inanon te umantabu ao akea ba e a karina naba ni kaoti temanna te aine ma uotana taian riaboro. A kubanako naakai iroun te aine aio ba e a bon ti kamangoao naba aron aia tataro n tetetae ni karererera man taetae n aki akaaka. A tanrikaki ao a ataia ba iai te riaboro irouna.

Ngke a waakina aia katokabai inanon naba te tai arei ao unimane are ai bon te tatan-

inga n te maneaba ma te amarake. Te bai ae riki e bon riaon ae kantaningaki ba ngke e a waaki te tataro ao e a bon tauia naba naakai ma aia aoraki aei man te aoa 7.00 am nakon te aoa 2.00 pm. A aki roko n te amarake ba e toka nanon te Uea irouia ba ai te tataro ni buakana te riaboro. Inanon aia waaki ao e a kaekaia naba te aine aei man taku "Tabuariki ngai, ao ai tebwina au ririki iroun neiei ao kam naera ngkami aika irua aika kam a aroko n urua au tabo ma abau ae Maiana?" Anne ana taeka imwin kataetaeana iroun Neiere Miraa ngke e kaangai nakoia "Kaotiko ba antai ngkoe". Imwiina ao e a manga taku Miraa "Ao ngkana ai tebwiina am ririki iroun Neiei ae Nei Bouataake ae Natin te Atua ao ko na kitanna ba akea am tabo irouna ba natin te Atua. E a manga taku neiere, "I rawa, ao I aki kan nako ba ai tebwina au ririki iroun neiei". N te tai anne ao te koraki a bon maiti ba ai te bane ni matak irouia. A bon bane kain te kaawa ake a kona n nakonako.



E a manga bon reitia riki te aoraki man taku n te bana n un "Ngkami aika te naan irua aika kam a roko n urua au tabo aei". E kaeka

Miira man taku. "Ao kaotira ba antai arara ba ngaira bon kain Maiana ao tiaki irua ngaira ao ngkoe tiaki kain Maiana ba am tabo anne e bon atia IESU" E taetae Miiraa imuina ma te bana n un naba nakon te riaboro, "Ba ngaia ba ko bon kinaira ba IESU ngaira ao n te miniti aio ao te aoa naba man te bong aei ao ko nako ao ko na kitana neiei ba akea am tabo irouna ba neiei bon Natin te Atua"

Ngke e nang nako Tabuariki ibukin ana taeka ae kangai "I a maraki ao I a kainnano iroumi n ami taetae n ianena ao N nang nako". Ao e a manga kangai Nei Miiraa "Ao naako ao kateniu amti taeka ni kangai, "I a nako ngai ae Tabuariki". E kaeka te riaboro ao e kangai teniuia te tai,"I a nako ngai ae Tabuariki. Ngke e a nako te anti ae Tabuariki ao e a moana nako naba te aomata are e roko ba e na kawaekoia Teema ma raona ba a na amarake ma unimane are bon Ten Tonana. Inanon rokona iroun Tonana ao e a kairia ba e nako moa n anaa ana baene n te maneaba ao imwiina e manga kairia nako n ana naba ana karaun ba e na kabaka i taari.

E anaa ana karaun n ana auti ao e a kabaka i taari iaan bubuan waena. Ma te kuba tera ba e a ti iabuti naba taari man roko iaan baina te iabuti. Bon te aomata ae bubura Tonana ba muin Nauru. E a uua



man uaua ao e a tatakarua "I mate, I mate". E ngae ni bwabwa ao e a bua ana iango. E ngae naba n taratara nako ba e taku ba e na iai ae e na roko ma bon akeia. E inako ao e otirake ao e nima taari ao e a bon kaan ae e nang mate. E raroa ana tabo ba are e bon nako matani kabi n te nama. N tokina ao e a bubutia lesu ao n taku "lesu kamaiual, lesu kamaiuai" Inanon ana tai n ibekibeki ni kakaea angina ma ikena ao e a tekeraoi ni beena ba e na kabara ao man uaua naba iai ngke e katibua. Ao mai ikekei ao kanga e a reke buokana iai ao man uarakea eta. Ngke e a roko ieta ao e aki te roko n te rautariaia ma e a bon birinakoia naba te koraki ni Charismatic aikai ao e tatakarueaa matena man taku "I mate I mate, kamaiuai". Ngke a karaoa aia tataro ao bon moan te kainako te anti aei mairoun teueai.




Ao ngke e nako ngkhoa Tabuariki mai iroun te aine ae Nei Boutaake ao ngaia iai riki ake a tiku irouna imwina ba Nei Kanna, Nei Tina ni Moone, Terakunene, Riannewekabane, Kaobunnang ao Taburitongoun. Ma anti aikai kanga a bon kainako mai irouna.

Imuina ao ai bon kawaran Tebanga. Ngke a roko i Tebanga ao a manga kaitibo naba ma te riaboro are e kaotia iaon rabataia aomata, n aron te aomata ae Ten Tiito are bon te boori ao ai tebwi tabun te ririki aorakina aio irouna. Ngke a karaoa aia katokabai iaona ao e a bon maruung naba ba e a bon teirake naba man nako n ira kanoan te kaongora n te maneaba n te tai arei. Teuae bon kain te Itibong (SDA) ao n rokona n te maneaba ao aomata a tira n roko ba te ongora irouia kain ana tiim te tautaeka n rokoia n te tai anne. N rokon Tiito n te maneaba ao akeia ba e a tatakarueaa naba ana kamaiui lesu nakoina man taku "Tanimaeang, Tanimaiaki, Tanimainiku ma Tanimaeao, Tara Tiito ngkai, kam noria? E a kamaiuaki iroun lesu n aia tataro nako nakeke teniman akekei". Ngke e taetae ao e tei n ramana te maneaba mai itinaniku ma te bana ae e baibati n atonga anne ieta. E aki toki nanona imwiin taetaena i maiakin te maneaba ao e a manga rin n te maneaba ao ni manga kabaibata banana ao ni manga takarua ni kabai-bata banana ao ni manga taekin naba ana taeka akekei "Tara Tiito ngkai!! Kam noria?... E kamaiuaki iroun lesu". Imwiin anne ao e a manga mananga nakon iteran te maneaba are te iterana ao kanga e a riki bwa ai te mino n tatakarueaa ana Kamaiui te Uea.

N tikuia ikanne ao e



a roko te tama loteba ao e a bon raonii ni karoan aia kanako riaboro. Ngke e a bon rabane kaean ke kawaran kawa irouia ao a manga bon okira aia moan tabo are a moan waaki iai ae Bubutei. Tao ai teniuia te tai kawaran kaawa irouia nakai ma aia kooti are a teimatoa ni karoao nakoia aomata ao man rikoi baai ni riaboro, boni mai Bubutei nako Tekaranga. N aia kateniuia ni wiki ao a bon anganaki ngkanne, taian baa ni kakaraoi, booki n tabunea, bunna ni kamauri n aron te kora, te iran atu, ao ai bon rinanin baai n tabunea riki tabeua n aron te nana te kuo n aine ao a bon bati riki. Man mwiiin te tai anne ao kanga a rairi nanoia kain Maiana ake a anga aia bai n tabunea.



N aia kanimaua ni wiki ngke e a roko te Tama loteba. E reke ana iango Teema ao e tunanga te Tama ba a nang nako n urua te bangota ae Nei Kanna i Bubutei. N rokoia ikekei ao a mananga iaon bubuan waeia ma baia ba are uakan ma te bangota ma taian auti ni maeka. E tatanning te Tama ao Teema e a kawakawa tao uabwi (20) te miita ao e nako n urua te bangota. Inanon te managa aio ao e bon noraki kamimin ana Tangira ma ana Kakawakin te Uea nakoia ara moan 'mitinare' ni charismatic aikai ni karo-koan ana Kamaiui te Atua nakoia kaini Maiana, riki ake a tia n rairi nanoia. Te koaua ikai ba kamimin ana kakai ma ana makuri n ibuobuoki te Uea, E bon roko n tabo nako man nini bai ni kabane.

Ti karaba ao ti neboa te Atua ni baai ni kabane... Alleluia!!!!

".....anganaki ngkanne,
taian baa ni kakaraoi,
booki n
tabunea....."



Kaongora man NSC

Ribootin te Mananga Nako Tabiteuea Maiaki
Kaoti Teingoa, Teaoraereke

Ti kitana Tarawa n te kaabong 9/4/09 iaon Super Carrier. Maitia kain ara tiim bon tengau ma niman (15) bon man Tearaereke Parish. Kanoan ara waaki iaon baora ni karokoa ti roko i Tabiteua Meang bon Te nebonebo ni ktoa karangaina, Te Bau n Nanoanga n te aoa 3 koraki, ao ai Rotario ni ktoa tairiki

A. Abemama 11/4 - 12/4/09

Imwin te Tutia are n tairikin te Kaonbong Tabu ao ti reitaki n nebonebo ma tarira ao manera ake a roko ni kaea te Toa. Ti a katokabai naba iaoia tabeman ake a roko ian te kantingga are a na manga reke ba taan kamarurungia taria ao maneia ake a mamara.

B. Tabibeuea meang 14/4 - 16/4/09

Imain rokora i Tabiteuea Meang ao ti reitaki n nebonebo ao inanon ara tai n anene ao e a anganaki naba manera ae Nei Ruonamakin te tamnei (vision) ae kangai taekana:

"I nora te maneaba teuana iaon Tabiteuea Maiaki ae iai ona ao imarenan te o ma te maneaba ao a karekebai ataei aika uarereke ae kaka aua (4) aia ririki ni katobibia te maneaba anne, ao taraaia ataei aikai kanga tamnei aika buakaka"

I kaeka Ruonamakin ao ni karaba n ana karea ao e na bon kakoroa bukina Te Uea n rokora ikekei. Ti roko i Tabiteuea Meang n te Kauabong 14/4/09. N tikura ikai inanon uoua (2) te bong ao aikai bai ake ti wakina Te katokabai iaoin te Tiibi Leader ma kain ana tiim; Te katokabai iaoia Catechist ake a bane ni botaki i Tanaeang ibukin aia katauraoi nakon aia Toa Betero Tiroi; Katoki aoraki irouia aoraki ae tao maitia e kaan bubua te aomata ma te karau-taeka n aki banen makuri aikai ibukin uarereken te tai ma tia katikua iroun aia Tiibi Leader ma ana tiim ni katoki aoraki; ao te kaungai riki nanoia ni matennanoan Ana karea te Tamnei ae Raoiroi.

Ana tangira Te Uea

Iai te ataeinimane ae e a kaman roko taekana ioura ibukin buokana ba bon natin manera ae Maungaroa ae e reirei i Tabiteuea Meang, ao aorakina e bon irekereke ma teuare buakaka. N rokora i Tanaeang ao e kawara tinana aio ba e taku ba e aki raoiroi ana taratara ba kanga e a mataki ao e a namakina mwebu-akana n ana auti, ma ngke e roko irarikin tinana ao e taku ba e namakina te kukurei ao ana taratara e taku ba e a raoiroi. N tain te tatato ma ngaia ao a otinako riaborona aika niman (5) ba i) taburitongaun, ii) routakani iii) kooka, iv) teka-bane ao te v) unimane, are e a bon tiku n rawa ni kitana te ataei aei ao ni wene iaona man bonota ikena. Inanon te ataeinimane aei ao e kaeka tinana ni kangai "mommy ko na tiringai?,"

"mommy ko na tiringai?, ngaia aei ae ko kairai nakoia nakai"

ngaia aei ae ko kairai nakoia nakai" ma e tuanga tinana ba tiaki kain te tataro ae a na tiringa ma bon raona ake a mena irouna. Ni korakoran te ribano ni ianena ao e a nako te unimane ao e teirake te ataei ni karaba Te Uea ao n tabeki baina n nebonebo. E raba Te Uea n ana Tangira nakon te ataeinimane aio.

C. Tabiteuea Maiaki 16/4 - 10/5/09

Teauana mai ibuakon ara kanoa inanon kawaran kawan Tabiteuea Maiaki bon te reirei iaoan iteran ana waaki te charismatic n aron aikai:- Kabarabaran te Charismatic, Te Tataro Nebonebo, Nei Maria ao Te Tamnei ae Raoiroi, Ana karea Te Tamnei ae Raoiroi, Te Tataro ao Te Taetae ni burabeti

Inanon kabarabaran taian karea akanne ao ti reitaki ma nake iai irouia ao n tibaia n te aro ba a aonga ni matata raoi kain te Charismatic iaon Tabiteuea Maiaki, te koraki aika tibatiba aikai bon kain ara tiim ake iai irouia karea akanne.

Ana Makuri aika kamimi te Uea

I Buariki (16/4 - 18/4/09) ao maiti ake a mamara ao a manga oki. E rikirake aron aia nebonebo ni korakora man reke naba irouia te karea ni lanena. A kaikaki uoman manera ake bon kain te Charismatic ma a tiku ni kariribai imarenaia inanon iraua te ririki. Ma e raba Te Uea n te tai aei ba n te kabanea ni bong are ti nang kitana Buariki nako Tewai, ao ti uti n teingabong anne n nebonebo ao ni baran te nebonebo ao a bon kania ma ni kaeia i bon irouia ni irabati ao ni kababarure ibuakon te tang ae korakora. E kakauaki ba imwin aei ao a reke tibangaia nakai ni karea aika te lanena ao te Taetae ni Burabeti.

I Tewai (18/4 - 20/4/09) ao ti noora aron kanoan te karea ni matairiki are e anganaki Ruonamakin iaon te kaibuke are kaota tauan taekan maneabaia irouia riaboro ake a uarereke. N rokora n te kawa aio ao e kawarai te Catechist ae Tabera ni bubuti buokan natina ae tao aua ana ririki nakon te tiim. Aorakin natina aio kanga e uruaki ana iango, ao ngkana e kan nakon te tabo teuana ao e a bon taonnako naba n akeaa atakina irouia, ti ngkana a kaongoaki irouia ake a noria. I kaeka te Catechist aio ni kangai ti na karaoia ma te bai ae moan te raoiroi ba ti na angan Te Uea inanon tataroakinana. I reitaki ma kain ara tiim ao n tuangga ba ti a tataroakinana ana kanganga te Catechist.

N te tairiki anne ao ti nebonebo man katokabai iaoia te koraki ake a kainanoa buokaia. Inanon te ribano n ianena ao l a noria ataei aika uarereke aikai a katobibi imarenan ara moan ni mronron ao te kauoua ao inanon rebwetauan te ribano ni ianena anne ao a otinako n riraku ma ngke l kaurei matau n tarai aao bon akeaa te ataei ae e aiwa inanon te maneaba. N te karangaina are imwina ao ti a manga nebonebo naba ao a manga noraki naba ataei akekei man te tai aei e noria maneu ae Nei Teakoua Tiaon. N te karangaina are ai ara kabanea ni bong ti a manga nebonebo naba. Ngkanne n te tai aei ao l a nora te

aine ae toba te tei, ao au iango ngai I taku ba e a kaoti Nei Maria nakoiria ma natina ae lesu, ma inanon miakinan te tamnei aei ao kanga tarana irou kanga ai bon tiaki riban te aomata ae tabu, ngaia are I a butia lesu ni kangai "Te Uea tera nanon te tamnei ae Ko anganai aei?" Imwin are I butia Te Uea ao e a bon katikaki naba te tamnei arei ni kaniaki imatau ao I a bon kina raoi ba Nei Terokoiti are bun te Catechist ae e toba Kaobunang. N reitaki naba ma anne ao iai naba te tamnei ae e anganaki maneua ae Nei Meera Kaitaake n tain naba te neboneyo ba e nora natin te Catechist arei ba e mena inanon te O ae e katineaki inanon te maneaba. Ti a bane n tiba aio imwin te neboneyo ao ngke I tibaa au noraba arei ao e a bon katurua naba tarakiu buun te Catechist ma matana ae katokai nakoi. Imwin anne ao ti a nakon te umantabu n tataro ma tangan te catechist ao natia. Inanon te katokabai ma te neboneyo ae rebwetaua ao a noraki baike a uareke reke akekei n reitaki ma taian beki aika mainaina, uraura ao aika mata-mata n otinako mai irouia ao n otinako man te umantabu n nako taari man tatanrikaki n tara te tabo are a kitanna. E raba Te Uea. A taekinna ainen Tewai ba imain rokora ao e niniaki are bun te catechist iroun Kaobunang ngke e matu inanon te maneaba aio n te ngaina.



Te kauoua ngkanne bon rongorongon bon rongorongon te unimane ae buun lakoba ae e ririba te charismatic n ana waki ae te ribano ni ianena, ao te katokabai. Iai tibun lakoba aika uoman ataeinaine ae te roro ae 15 ao te 14 te ririki ao aorakia ataeinaine aikai te maraki n atu iroun neiere te ikawai ao te kabuebe iroun are te karimwi. E kawarai tibua te unimane ibukin buokaia tibuna aikai, ao I kaeka ni kangai kai tiaki ngaira ae ti na katoka aorakiia, ma ti na bon angan lesu ae bon ngaia te taokita ae maaka iaioa taokita, ma taraiia iai kain abam ao ngaia e kaeka iai, ao ngaia ko kaira tibum ma kainabam n nakomai ba kam na reitira tibumi ao ngaia e kaeka ae e taku ba e na bon bae n aki iri kainabana ba e ririba te charismatic. Ma I a kauarerekeao n tuanga ba ngkana e tangirria tibuna ao ke nakomai n reitira ba tiaki te aoraki n rabata irouia tibumi ma ana kaoraki teuare buakaka. E nako neiei ao e a oki ma tibuna akekei ao a rin n te umantabu ao e aki man imwina ao e roko te catechist ae e kan reita naba te makuri ao e roko naba lakoba. Ti a kaai n rin te umantabu ba are a tia n roko ara koraki. N tain te katoki aoraki ao e raba ana tangira Te Uea nakon te catechist ae Tabera ba ai bon te charismatic ni koaua ba e korakora ana ribano ni ianena. N rebwetauan te ianena ao e a otinako te unaine ma irouia ataei aikai n rirarikiu ni kaea te mataroa are e in ao n otinako iai n akea ana kanganga.

Imwin baran te tataro ao ti a baneakina



te maneaba ba ai te katauraoi iroura ba are a roko kain Taungaeaka ba a na manga inaira nakon aia kawa. E a nako te maroro ao e a teirake lakoba ba are bon ngaia unimanen

Tewai ni maroro ao n reitia nakoia ana koraki n Tewai ni kaotia ba e a tiba oki man te umantabu ao Nna tiba tibangau ae reke n tain aia katokabai kain te tiim aei. N tain te tataro ao I a bon ongo nanon aia tataro te koraki aikai ni kabane n aia tataro are te taetae ni ianena ao te taeka ae rangin tangimaka i taningau ao n ringai bon te taeka ae kangai "kauka nanom ba Nna rin iai" e titibiba lakoba ibuakon te tang ae korakora. A bane n rotaki kain Tewai ba a ringaki n ana titibiba ao a bane ni wanako ranin mataia mani mabu te maneaba n akea te karongoa. E reitia lakoba nakoia kain Tewai ba bai ni kabane ake a titibiba iai kain te tiim aio iaon taian karea bon te koaua ni koaua ao akea kairuana, n ai aron ae I noria ngai te tai aei ao I ringaki iai ibukina ba I bon rangin totokoia ao n aki kakoaua, ao e raba te tiim aei ba e bon rangin manena ao ni bongana rokona n ara abamakoro aei ba e barongai raoi kanoan wana, ao aia katauraoi a karoaia raoi inanon taian koaua n ai aron ae I noria n te bong aei. E raba Te Uea.

I Taungaeaka (20/4 - 22/4/09) a maiti kain te botaki ake a mamara ao a manga teirake. A maiti naba ake a kainnanoa te katoki aoraki ao a namakina buokaia n tain te tataro

I Katabanga (24/4 - 26/4/09) ao iai temanna te aine ae bubuti buokana ibukin aorakin baina aika uaai ba a roroko marakia ae korakora ao ai bon akea te bai ae kona ni karoia. Ti reitaki ma ngaia n te katokabai. Te kauoman n aoraki bon kain Taungaeaka ao aorakin neiei akea ma te bai ae e maku iai ba a roko baike a uarereke akekei n ninianako inanon ana bangga n tatakaro iai. A bon maiti kurikuri aia koraki ao temanna mai buakoia te mane ae uareke are e roko naba n tinetine ni mamma irouna.

Taaku 26/4 - 28/4/09. Temanna te unimane ae arana Kaikai Timau ana karo are bun te catechist. Te bai ae riki iroun teuiae ba n te taina tao ni 2001 ao e mena i Tarawa ao e kaea te Tutia i Teoraereke ao ni baran te tataro ao e a otinako ao e baka naba ngke e tabe n ruo rikaki man tenan step. Ngke e baka ao e bakara ana itera ae te atai ao ngaia ngkanne are e a riki iai ikoakina ao kanga e a tine waena are te angatai ao e maraki ao kanga e a uakinna ngkana e nakonako. Imwin te katokabai ma ngaia ao ti a kitanna ni manga nakon Manuera. Ngke ti a oki ao e a rin te maneaba ni kakakaei ma I bon rangin mimi ngke I a noria ao kanga e a waetata n nakonako kanga ai manga te ataeinimane ao e a bon miakinnia naba bun natina ae te catechist. E kawarai i tabon te maneaba ao ngke e roko irou ao aio ana taeka "E raba ami tataro ma N nang rimoami nako Buariki" I kaeka ni karaba Te Uea ba bon



*"Ta bane n ongo nanon
taian taetae ni ianena
inanon tain te
tataro....."*



“Bon iai baera ae moan te kakawaki ngkanne ngaira ake ti anganaki karea aikai ba ti riai ni kabonganai ma te ongotaeka, te nanoanga ao te kakaonimaki...”

Ngaia ae E karaoa anne nakoim. Ara kauoman n aoraki bon Manuera Naiti ae bun Nei Anna ae bon te Leader n te charismatic i Taku. Teuae i a bon aoaoria naba n ana auti ba are bon te tenaki baina ma waena (te mauku) ao e tiku n arona aio tao inanon te tai ae e a kan uoua te ririki. E taku Anna ba a ngae taan riring n ringnga ao e bon aki reke naba buokana. Ma imuun te katokabai ao e kateirakeaki te mauku aei man aorakina.

N te karea ni burabeti are e otinako iaon Taaku ao otinako ana taeka te Uea ae kangai “E a marurung te charismatic iaon Abemama” mai iroun manera ae Nei Turiana Tekiuia.

Ni manga okiran Buariki (28/4 - 10/5/09) ao inanon te nebonebo nte aoa 5am n te umantabu e a manga nako naba te karea ni burabeti ae kangai “lai ana makuri Te Uea ae e na karoaki n te bong aei ao a riai n tia imain te bong” A kubanako kain Tabiteua Maiaki n te rongorongo aei ao a taku kai bon akea te rongorongo aei ngke ti wareka Ana taeka Te Uea. Ni baran te nebonebo ao e roko irou te Tiibi Leader ao e tiriraki ba tera te rongorongo arei. I kaeka nakoina ni kangai anne bon te taetae ni burabeti aane e anganira te order ibukin te makuri ae e na karoaki, ao n riai naba n tia n te bong aei imain te bong. Imwin te kaingabong ao a roko naba taian kaa aika tokaraki irouwia aoraki, ao ni ikotaki ma auti aika a kainanoa anaakin bai n tabunea iai, maitin te makuri n te tai anne ake a roko kainanoia bon 10, ao ti karaba naba Te Uea ba E anganira te korakora ni katiai naba imain te bong. E reitinako kaitiakan taiani bai n tabunea iaan auti i Buariki n te bong are imuina ao tao nakon ae kan bwi auti n te tai anne.



N te bong are imuina ao E a bubuti te katokabai irouna te mataniwi ni catechist ao e karoaki aei imwin te taromauri ni komunio ma kaotinakoan te Eukari. Inanon te kain-gabong n te maneaba, ao e a teirake te catechist ae Teata n tiba te bai are e riki nakoina n te umantabu. “N te ingabong aei ao bon iai te bae I noria n tain te katokabai ba I nori tamnei aika uoua aika a ruo n tei imatau ba bon tamnein Nei Maria ma Natina ae lesu. Ngke a kaoti tamnei aikai ao I rangin ni kukurei nakon Te Uea ao ni karaba ba E a anganai te koaua ni koaua are I a kaotia nakoimi kain te maneaba ni kabane ba taian reirei ake a anga kain te tiim aei iaon ana karea Te Tamnei ae Raoiroi bon taian koaua ni kabane ao ae I anganaki kokoauana n te bong aei.

E kokoauaki ba imuun rokon te tiim ao e tia ni manga kabouaki ao ni kakorakoraki tarira ma manera n te charismatic i Tabiteua Maiaki.

E na neboaki te Uea n ana makuri ni kamaiu aika batia iaon Tabiteuea Maiaki rinanoia kain te tiim. E raba te Atua...Alleluia!!

Taeka n Reirei

Ana Karea aika a Kaonoti te Tamnei ae Raoiroi
Iroun Kaoti Teingoa (Tia Babaire n te NSC) ao Uriam Timiti

Irarikin karea ake ti anganaki n te Babetito ake a karikiira ba natin te Atua ao bon iai riki Ana Karea te Tamnei ae Raoiroi ae kaonoti (charism) nakon temanna ma temanna. Ti anganaki karea aikai tiaki bon i bukira ma bon ibukin kakoroan Nanon te Atua ni kan karokoa ana Kamaiu nakoia ana botanaomata. Karea aikai a bon aki manennanti n reke i roura ma bon kanoan Ana Babaire ni Kamaiu te Atua i bukia ana botanaomata ae a kaman iai nttaai nako. Kanga ai aron Nei Maria ae rineana ba e na riki ba Tinan Natin te Atua bon te bai ae e a kaman iai inanon ana Babaire te Atua. Ao reken karea aika kaonoti aikai iroura bon te bai ti a tia ni kakaonimaki ake te nanououa ba ti atia n anganaki inanon baai ke kanikina ake E a tia n ringii iai maiura te Tamnei ae Raoiroi.

Bon iai baera ae moan te kakawaki ngkanne ngaira ake ti anganaki karea aikai ba ti riai ni kabonganai ma te ongotaeka, te nanoanga (charity) ao te kakaonimaki. Tabera naba ngaira naba kain te botaki ni charismatic bon te tataro ibukin karea aikai ba a na rikirake ibukin mammakurin Te Tamnei ae Raoiroi i buakora ao ibukin neboan te Atua ma katongan karawa ikai i aonteaba. Ti na aki toki ni bubuti ba a na kawakinaki tarira ma manera aika iai karea aikai irouwia, kioina ngkai a na bon motikaki naba taekaa n aron aia kakaonimaki ni kamma-kuri ao ni kabonganai karea akanne n aron ana kantaninga te Uea. Ti na tataro naba ibukia ba a na aki kabonganai karea aikai ibukin kamoamoakia ma bon ti ibukin neboan te Atua are te Tia Karikiira.

A bon katuruturuaki man kamataataki ana Karea Te Tamnei ae Raoiroi aikai iroun St Bauro n ana moan reta nakoia I-Kirinto (Makoro 12 &14).

E rinanoi baike e maeuakini St Bauro ni moan tein te Ekaretia, ao e tangiriia moan Kiritian ba a na ata ana kawai ni makuri te Tamnei ae Raoiroi akana ruiwa (9) akanne, ao aikai ana kawai St. Bauro are a na kona n reke iai iroura karea akanne ba:

1. Ti na reirei taekan karea akanne
2. Ti na makuri
3. Ti na anga ngaira nako iai

Te International Catholic Charismatic Renewal Services Rome (ICCRS), e kamatoa are e taekina St. Bauro ao e a manga kurubuni ana kawai ni makuri te Tamnei ae Raoiroi akana ruiwa (9) akanne n tenua (3) te kurubu n ai aron aikai:

1. Te maaka n taetae (The Power to Say)
 - Te taetae ni lanena
 - Kabaran te taetae ni lanena
 - Te taetae ni burabeti
2. Te maaka n atatai (The power to know)
 - Te taetae ni wanawana
 - Te taetae n ataibai
 - Te matairiki
3. Te maaka ni makuri (The power to act)
 - Te karea n onimaki
 - Te karea ni katoki aoraki
 - Te karea ae te kakai.

Ana Tangira Te Uea

Neiko ao Anne Natim... ao Anne Tinam - Ana Tangira Iesu Ibukiu

Kantarawa Uriam, Santa Maria Charismatic Renewal, Bikenibeu

Kam na mauri tariu ao maneu n ana Tangira te Atua ae Maeu!!!!. I main ae I

CommentsGuru.com



kaongoraeko au rongorongo aei ao I bon rimoa ni karaba te Atua ibukin ana beba ni kaongora ae te Emmanuera are e a tia n anganira ba teuana kawain katabangakan ao

karababan te rongorongo ae raoiroi are e a kona iai n tibatibaki ao ni kaokaotaki iai aron ana makuri n tangira te Atua nakoira n tatabemanira ba e aonga ni manga karekea te manga bungjaki nakoia tarira ma manera ake a bon tabe naba n reimaurua ibuakon kaubain ma kakamaeun te aonnaba aio are bon tiaki nnera ni koaua ngkai boni iai te maeu ke te tabo teuana are boni nnera ni koaua ae a bon tia ni katauraoaki ibukira. Bon au bubuti ma au tataro nakon te Atua ae maeu ba E na kateimatoa maiureirein ara beba ni kaongora aio ao n anganira naake e mwiokoia te korakora, te botumaka, ao te tatauraoi n anga boni ngaia ni butimaea tibangaiia are E a tia ni mwiokoia iai te Uea ibukin kabobongan te beba ni kaongora aio. Bon te Atua ae maiu are boni Ngaia ae na kakabaiai ngkami ma ami utu i bukin te beku ae kakawaki aio Ibuksina.

Arau bon Nei Kantarawa ao aran tamau bon Noa ao tinau Nei Meere ao kain te aba ngai ae Nikunau. Inanon rikirakeu bon te Kamatu ngai ni koaua ni karokoa te ririki 1989 ike I a iein iai ma kainnabau ae te Katorika. Tao man te tai anne are tao e a reke naba te onimaki irou are bon ti temanna te Atua ae ti toro irouna ma ni bon oin au iango I bon kakaea raoi ae bon koaua iaan te koaua ni Kamatu are e bon aki kakaoua Nei Maria ba e bure ao Katorika a kakaoua Nei Maria. I nanon kakaeau koaua aio ao tao bon ana makuri naba te Tamnei ae Raoiroi ba Nna riai ni butimaea te Babetito ao Rabatan te Uea inanon te Katorika ba are ngke I moani mareaki ma kain abau n te Katorika ao I bon aki anganaki iaan ae I bon tuai n tauraoi. Inanon irirakin kainnabau ma natiu ao I kunea ae ai bon akea nanon au onimaki ngkai I a bon aki kona ni butimaea Rabatan te Uea. E rikirake tangiran te Uea inanou ai ngaia are I a bubuti ba Nna reirei iroun te Tama ba I aonga ni babetitoaki ao man kaitibo ma te Uea. Kainnabau e bon aki naba kairoroai iaan are e a bon tia ara boraraoi ba e ti kabaei n te mare ao e anganai te inaomata n tiku n au aro are te Kamatu. Natira ngkana a riki a mena naba iaan te boraraoi are a na mena iaan tamaia. I ata kanoan te boraraoi aio ma te kamimi irou ba

aiaron ae ai bon tiaki te iein raoi ngkana ngai I mena n te aro teuana ao kainnabau ma natiu a mena n te aro teuana are irou e a bon aki rang kakukurei. I keiaki ni mena irarikin kainnabau ni iriria nakon ana aro ma teuana au kanganga ae matoatoa ba aiaron ae te bai ae I maku iai bon kakoauaan Nei Maria are n au onimaki ni Kamatu bon te bure ba a taku ba te boua ae kaaraki. Anne raoi oin au kanganga. Akea ba e a reke natira te m'ane ao are ni kanoan te bora raoi bon ana bai te m'ane ngaia are e a babetitoaki ao ni moan komunio naba n te Katorika. Ngai are akea au kanganga ba are I a bon Katorika ba I a tia ni babetitoaki ao n anganaki Rabatan te Uea ma tao bon te kiritian bekan ngai ngkanne ba i kabitoitoin nanou bon te tabeaianga n kakaean te koaua ae eti ae bon akea ae kona ni kaotaai iai ba n au onimaki bon ti te Atua ae E na anganai te koaua raoi.

Inanon te ririki 2002 inanon te namakaina ae Meei ao aio bon te namakaina ae tabu irouia kiritian ni katorika ba ana namakaina Nei Maria are ni kaotaaki iroun te unimane ae Rutio (te katekiti ngkao n te kaawa ae Manriki iaon Nikunau) ae aikoa ngkai ba e a kara ma e mena iroun natina i Bikenibeu iaon Tarawa are I bon karaba naba ba e tuangai ae e rineaki te namakaina ae Meei ba bon tain aroka ni kabane n anga ueeia aika raraoi ao e kakaouaaki ae te namakaina naba anne e kakaoti iai Nei Maria aingaia are e a tauaki te namakaina ae Meei ba ana namakaina Nei Maria. Aio am tai ngkoe te Kiritian ni kabaroil am bubuti nakon Nei Maria ba ana tai naba te tina aio n tituaraoi ao ni ibuobuoki rinanon natina ae lesu. E reitia naba te unimwane aio man taku bwa e noraki ongotaekan lesu iroun tinana n tain te mare are i Kaana ngke e tare te wain ao Nei Maria e tuanga lesu ba E na karekea te wain ao lesu e tuanga tinana ae e bon tuai n roko Ana tai ni karaoi kakai ma i bukin tangiran tinana ao ongeabana ao E ira nanon tinana ao E onika te ran nakon te wain. E reitia naba te unimane aio man taku ao ngke e nang moti iken lesu iaon te kaibangaki ao ana reirei ma tinan lesu a tei iaan ana kaibangaki ao lesu E nanokawaki iroun tinana ao e taku nakon tinana "neiko anne natim", ao nakon loane are E rangi n tatangiria, "nao ao anne tinam" are ngaira katorika ao ana aomata te Atua ni kabane ti a tia n anganaki Nei Maria ba tinara ao ti a riki ngaira ba natin Nei Maria are moan te kakannato Nei Maria ba boni ngaia tinara rinanon natina ae lesu are boni ngaia ara Uea ma ara Tia Kamaiu.

Ti bon aki irira aron waakin te makoro ma ti bon anganga ara karea n taai nako ba are bon te bai ae rang kakawaki ibukin te Uea. N te bakantaae teuana e tuai bui bongin te namakaina ae Meei, ngke I a mananga n nakon maneaban te makoro ae Kaama ni kaea te bingo ba bon ti anne bukin rorokou iai. Ngke I roko n te bingo e rawata te aomata ba are e bon rangi ni maeu te makoro n te tai anne. Te mitinare n te makoro n te tai anne bon Tebuka ma Monika. E bon rang



*"Inanon rikirakeu bon
te Kamatu ngai ni
koaua ni karokoa te
ririki 1989 ike"*



“Au tataro are anganai ngkekei e kangai: Ana tibutetei Te Atua ae Moan te Tabu; Kawawaea Raram ae moan te Kakawaki i aou.....”

maiti naba ana tai te mitinare ni kakawirira ma kainnabau ibukin rokora n te makoro ma are kainnabau e boni ianibata ao ngai are tao Nna kaumakia are I bon mena naba n te aonnaba ae kaokoro ao I bon nanano ni kamatu ba au utu a mena naba irou n taai akanne ngaia are I bon anganga au biri naba n te makoro ni kamatu. I nora Nei Maria n te maneaba ba e a kaotina-koaki ana taibora ao ni unekenekeaki ao ni kata-maroaki. I bon aki ata naba bukina ba are bon akea te bai ae ti ataia ba kainnabau tao bon te Katorika naba ni bekana. Ngke I roko ao are e a nako kain te bingo ma bon te tounako ngai ngke e a ti weteai naba te mitinare man tuangai ae au tei iroun Nei Maria n te bong are imwina. I bon rang tounako ao e nako nanou ao aron ae akea angin te bingo ba e a taonai te nako n nano ba te bai are e memena ngkoa i nanou e a noraki ngkai are I bon kakatuatuai ma ngaia. E noraba te Uea ba tao ai bon aio te tai are e nang kaeka iai au tabeaianga are e titiku inanou. I a bon tekateka ni bingo ma aiaron ae akea au iango n te bingo ba I a iangoa te tabe are Irou moan te tinebu ao n rawawata karoana. I karaba te Tamnei ae Raorioi ba E anganai te uki n nano are I a kauka nanou ao man tauraoi ni butimaea te tibanga aio ma te kanganga ba are I boou nakon te waaki ao te bitaki are N nang rinanona aio. E a bara te bingo ao ngai I a tiku n tataninga baneia aine n nako ba are N nang maroro ma te mitinare ibukin te tabe are e rangi ni boou irou anne. I a nakon buun au mitinare are Nei Monika ao ni maroro ma ngaia ni kaotaii ao I a bubutia naba au tataro ngkai boni iai te tataro ae te Rotario ae waakinaki ao ngaira bon akea naba ataakina ao e waaki man moan te namakaina ao e a kaan bui bongin te namakaina ngkai. I kababarai nakon te Mitinare are bon te Kamatu ngai ma akeai te kanganga ba Nna rinanon te tibanga aio ba N nang bon noria ba tera mwina. Nanon au taeka aio bwa bon te Uea ae E na anganai te koaua ba Nna tataroakinna. Iai au tataro ae anganai te Mitinare ngke I bubutia ma e tuangai ba Nna karekeau boki n tataro I Teaoraereke ae bon te Rotario ba ti aonga ma kainnabau ao natiu ni karoia ma ngkekei naba.

Au tataro are anganai ngkekei e kangai:

Ana tibutetei Te Atua ae Moan te Tabu; Kawawaea Raram ae moan te Kakawaki i aou, kainnabau, natiu ao (aomata ake ko kan atongia);

Tebokiira, Kaitiakiira, Katanira ao Kata-bu-

akaka ake a na manga tautaeakiira ma kainna-

bau, natiu (ao ake ko kana tong araia),

Kabaeia i aan am kaibangaki ao karenakolia i

kabin te ai ni moone ao Kaurarakejia ao Kata-

boroi marakiia. I onimakiniko te Uea.

Tamara are i Karawa (teuana), Ko na mauri

Maria (3 te tai) ao E na Neboaki

I karaba te Uea rinanon au mitinare ba E mwakuri ibukin nanou are akea ae noria ba bon ti ngai. I rang karabaraba nakon au mitinare ao are I a okira au auti. Ngke I roko n au

auti ao are I a karuoi naba ueen au auti ake bain te store ao I a teboki naba ao ni katinei bwa Nna kamauii imain te ingabong. E mimi kainnabau ao e kaekai man taku raam akanne? I kaeka ao I taku, a raoiroi au uee aikai ngkana I ueena iai Nei Maria ba ngaia au tei n ingabong irouna ae tuangai te Mitinare ngkai I nako ni bingko. Bon akea riki ana taeka kainnabau ba n au iango ao e bon rang ni mimi naba n te bitaki aio Irou. I ataia ae bon nanon raou aio bon te kan kairai nakon ana aro ma tao e bon bae n te boraraoi are ti mena inanona. Ngai ngkanne I a manga tuanga ba ngkana ko uti maka n ingabong ao ko kautai ba Nna nako ni kinikau ba Irou e bon tikiraoi riki te uee ae boou ba e tararaoi ao ni boiarara. I tangiria ni kauti nako ni kinikau ba I aonga naba ni kauia baou ni makuri ba are I makuri ngkanne n te tai anne n te Works & Energy I Betio. N te bong are imwiina ao are I a bon utimaka n nako ni kinikau ae are I kaea rarikin te Environment ngkai e bon rang rawata ueen rarikin aia aobiti. Bon akea aomata ba are bon karangaina ba tao mwin 6 n te ingabong. Ngke Nnang waakina au kinikau ae are I a taetae naba ma lesu. Aio ngkanne au taeka.

“Iesu ko bon ata bukin au kinikauae aio ba boni ibukin tinam ae Nei Maria. I ataia lesu ba Nei Maria e bon karikiko ma ngai lesu ko bon nora naba te onimaki ae I mena iai ao aiaron ae I a tabeaianga iai ao I aki ataia ba eti ae I karoia aio ibukin tinam ke e aki ma ngai I karoiaia ba I kakoaua ae bon tinam Nei Maria ma lesu I aki ataa ae eti ma ngaia ae boni ngkoe ae ko na tuangai te koaua ba ngkana eti ae I karoia aio ibukin tinam ao Ko na kaota nakoii te kanikinaa ae te bai ae I rang kainnanoia ae natiu te aine ao ngkana ko anganai te kanikinaa anne ao I a bon riki naba ba te Katorika ni Koaua ni uaa mateu ao I a neboa naba Nei Maria ao ni kakoaua n aki toki.”

Ngke I tia n atonga au tataro aio ao aiaron ae I tebenako man te rawawata are I uouotia ba I

ataia ae lesu n au onimaki boni Ngai ae E na anganai raoi te koaua ao akea riki. I rangi ni kukurei ngke I a oki ao I a manga moana te auti teuana ni kinika

au nikarairai are I a kaitibo iai ma Rutio are te unimane are e buokai ni kaotaii n aron are I taekinna mai ieta. Ana taeka te unimwane aio ba ngkana iai kainnanom ni kabane butia Nei Maria ngkai ba e a tituaraoi ngkai ao man anganga ana ibuobuoki rinanon natina ae lesu.

I okira au auti ao ni katauraoa tinau ae boou ae Nei Maria ao imwiina I a nako ni makuri i Betio. Bon te kamimi nakoii inanon te namakaina anne bwa I a kaonrakeaki n te onimaki ae korakora ao I a karekei au boki n tataro I Teaoraereke ao are I a kaumakia kainnabau ma natiu are ti a bon waakiina naba ara Rotario



naba man te bong anne ngke e a reke ara boki ni ikotaaki n ara tataro are e anganai naba Nei Monika. E tuai bane bongin Meei ao aiaron ae I a namakina ana tangira te Uea are I ataia raoi ba l a bikoukou ao natiu te aine are ai bon te kanikinaa natiu anne. I nako ni makuri ao I a tataekinna nakoia raou ni makuri are I a bikoukou ao teuana ngkai au namakaina ao natiu ae I biritou bon te aine ae ana kanikina lesu. I reita au taeka nakoia riki tarui ni kamatu ba n te tai aio ao kam aikoa aranai ba tarimi ngai n te Kamatu ba ai te Katorika ngai ni koaua ni uaa mateu. Natiu aio ae te aine e bon kaotia nakoia lesu ba e babane nanona iroun tinana ae Nei Maria n aiarora naba ae babane nanora iroun tinara are e karikiira. I kabara au bure nakon lesu ma tinana ibukin riribakin tinana ma I ataia ae lesu e bon nora au nanomaraki ao e kabarai au bure i bukin riribakin tinana ao I ataia ae n te tai aio E butimaea au kabarabure. Ngkana arona ba I raure ma kainnabau ao I a bon tiku ba te Katorika ngai ni koaua ao bon akea temanna ae na manga kona n anaa au onimaki aio.

A bon rang mimi kain au aobiti n te tai anne ba aki taetae ao a bon rangi ni mata ni mimi ao tao I boni irouia a aranai ba tao I a mino. I tuangia raou ni kamatu ba e aera ngaira ngkai ti aki kakoaua Nei Maria ao n te baibara ti ataia ae e kanakoaki te Anera ae Kabiriera iroun te Atua nakon Nei Maria man tuannga ae na kariki iroun te Tamnei ae Raoiroi ao e na bungiia te natu te m'ane ao e na aranna ba Emanuera ae te 'Atua ibuakora'.

Kam bon ata te koaua ni kabane ma I taekina te kakai aio nakoimi bwa kam na kakoaua ma tiaki ngai ae Nna rairi ngkami ke ni karini ngkami n te maeu ae na roko ba te aomata bon te iangoa rinna n te maiu ae na roko. I karaba lesu ba E anganai te kanikinaa aio are E a bon kaota te koaua nakoia ao ni kateimatoaii nakon te onimaki ae akea temanna ae konaa ni manga anaina mairou. N te tai aio ao I a kaboo ma ngkami ba ai te Katorika ngai ni Koaua ni uaa mateu. I ataia ae a bon tuai rang kakoauaai ba are e bon tuai oti raoi ae I a bikoukou ba are ai bon tiba teuana te namakaina. Ngke tao e nang koro 3 namakaina ao tao e a tiba oti ba I mimi irouia raou ni mwakuri ngke a tuangai, Kantarawa kanga ko a bon tara raoi ni bikoukou ba e a oti raoi. I boni ngare ba I ataia ae aki kakoauaai n te moan tai ba are eti ba e bon tuai oti raoi. I kaekaiia ao I taku, kam na taua raoi ba ngkai ai au kateniua (3 months) n namakaina ao kam na riki ba au taani kakoaua ngkami ni karokoa bungu ao natiu ae I birotou aio bon te aine.

Bon akea au kanganga ba a bon bane n nakoraoi baai ni kabane tao ibukin ae bon ana kanikinaa lesu natiu aio ao ngke e a roko au tai ni bung ao I a kaman ataia ni koaua ba bon te aine natiu ao I bon karaba te Uea ba boni Ngai a anganai te onimaki, te ninikoria ao te rau. Ngke I a bungiia natiu ao I a bon takarua inanon te tabo ni bung ni karaba Nei Maria ma natina ae lesu ba e a reke natiu te aine are bon "Ana kanikinaa nakoia ibukin tinana ae te Baretenia ae Nei Maria".

Man te tai are I kaitibo iai ma lesu irarikin te meria ngke I kinikaue ao I a bon riki naba ba te aomata ae boou man riki ba te Katorika ngai ni koaua. Au utu ni kabane a bon aki kukurei ma e riai ni matata raoi ba te rin n te maiu ae na roko ko bon aki kona ni kaira temanna, ma te aomata ba bon te iangoa rinna i boni irouna ana onimaki ao ana kekeiaki.

I bubutiko lesu ba au rongorongo ae I taekinna aio Ko na kauaeaa inanoia taani wareware ni kabane ao riki ni kauki nanoia naake a tuai ni kona ni butimaiko ba ko na tautaeka inanoia ao ni mwengaia ao ni maeuia n taai nako.

"Ko batu n raba lesu ngkai Ko a tia n anganira tinam ae Nei Maria ba tinara naba iaan am Kaibangaki ae moan te Tabu are Ko kamaiura iai man ara bure ao mani karekeka nakoira te Maiu ae Onraken te Maiu. Nei Maria ae tinara ni koaua tataro ibukira ao riki ibukia ake a tuai mani kakauako ao ni karineko, ba ti na kabanei maiura ni kabane n tatangira Natim ae lesu mani kakaraoa ae Nanona ba ti aonga n te taina ni katonga ma ngkoe te kabala inanon kororaoi te mimitong i Karawa, Amen".


Ko raba te Uea Alleluia!!!!

E Katokai Baino ao E kamarurungai lesu

Baranika Maatin, St Padre Pio, Suva

Mauri tariu ma mane u n ana tangira te Uea ae boiarara.

E kukurei nanou n tiba ma ngkami kakukurein ana Tangira ana Kamaiu te Uea ae I aki kantaningaia nakoia. Bon temanna ngai kain te Charismatic mai iaon Suva n ara botaki ae Saint Padre Pio Charismatic Renewal Group are I a tia ni katonga ana Tangira te Uea nakoia mani kamarurungakiu man aoraku. Ngai bon Nei Baranika Teiti kain Abemama ao I boni ira buu ae Martin Pine ni karoan ana rerei n te USP Fiji.



Ai bon teniu tabun ririkin weneakinan aoraku aio ae te aki rangi ni kona te nakonako n ae raroa ibukin te maraki ae rereke man bebeu are ataiu. I kakouaua ao man namakinna bwa bon te toara ngkai ai bon iriau te toro ni kakatoka marakuu inanon au tai n nanakonako n taabo ake I nako iai. Aoraku aio e bon rota naba kainnabau ngkai I bon aki kona ni ubawai ke ni uouotia natira ma ti te katiotioi baiu ao n toro ke ni motirawa ririkin kawai n rokon marakin waeu. A boni maiti naba au taokita mai Kiribati iaon te riring ni Kiribati ao bon taokitan te O n aoraki n aia itera Imatang ma e bon aki reke buokau irouia. Kabanean taekana mai iroui taokita i Fiji bwa e tangira te kataratara ba tao iai ian rangau aika a tia ni moti. E rotai te maku ao I a taona nanou ba I aki tangira te tutuo ba I aki kani kakoaua te



*"Ai bon teniu tabun
ririkin weneakinan
aoraku aio ae te aki
rangi ni kona te
nakonako n ae raroa
ibukin te maraki"*



*"E ngae n anne ao ai
kamira ba ngaia e boni
koaua ae E maka te
Uea iaoni baai ni
kabane"*

kanganga ae a nangi moti ian waeu. Irarikin anne ao e boni kaungai kainnabau man taku bwa akea riki ba ti te Charismatic a e ngaia ara botaki ae boou ae kona ni katoka aoraki aei ba bon akea ngai au koaua iai.

E ngae n anne ao ai kamira ba ngaia e boni koaua ae E maka te Uea iaoni baai ni kabane. Bon te bong ae te Kanimabong 14th August 2009 are ti kamatoa iai tein ara rabata ni katoki aoraki n ara botaki ao are mataniwinna Nei Benateta are I a kamaiuaki iai ma aorakin waeu ma I aki waekoa ni kakoaua. N te tairiki n nebonebo anne ao ti bane ni bubuti ibukin katokakin aorakira aika kakaokoro ni kabouan ana makuri ni katoki aoraki te rabwata ae boou aio ao man anenea iai te kuna ae kangai taekana " KATOKA BAIM IESU, KATOKA IAORA KAMARURUNGIRA BWA TI ONIMAKINIKO." Ni baran te nebonebo ao iai au namakin ae e a bua te maraki are I ataia ba iriau n taai nako ma I aki kakoaua raoi.

N okiran mwengara ao I a moanna n tabeaianga ni kakaea maraku arei ma e a boni bua. I bon tiku naba n raraoma ao I a taekinna nakon kainnabau bwa kanga ngai temanna ae I kamaiuaki man aoraki. E moti ara iango ba ti na kabonga ara bong are imwina n ririaki n te town ni kakoaua ke ni kamatoa te kamaiuaki aei. Ti boni kauia ma kabanean bongin te "Hibiscus festival" are te Kaonobong. E bongi buaka bwa te karau ae korakora ma ti bon rianna nako naba ibukin nanora ni kani kakoaua te bai ae riki nakoio. E boni bong au bong n rerebaua rian te karau n akea manga namakinan te maraki are I a tia ni uouotia inanon te maan ae teniu tabun te ririki. Mai ikai are I a kakoaua iai ba ngaia boni Ngai naba temanna are e a tia n rineai te Uea ba Nna katoonga ao man namakina karewen ana tangira iaon te aba ke te mwenga ae kai mauna nako aei. E bon taonai te kimarerei, te kukurei ao te kakatonga bwa ai maia ae I a namakina ana mwakuri n akoi te Uea nakoio? Ribuakon aki ukin nanou ma mamarau aika maiti ao ngaia e mannanoai naba te Uea ao n rineai ba Nna namakina ao ni katonga ana makuri ni kamaiu. E oneaki aron taran te bong irou ao aron ao I a tatae ni kawai ma au Uea n te tabo ao n te mwenga ae boou ae kanga ai aron katotongan Kanaan ke Karawa irou i aonteaba. E a tae ana kai te aoraki ba I a nakonako raoi n akea manga namakinan te maraki. Ao ai kamira ai rabara te Uea n ana Nanoanga ma ana Tangira???

Ti a uataboa ara taeka n nebo ba e kamaiu mani kakukurei ana makuri n akoi te Uea. Ti a uaia tatakaruaea ao n tuangia kaina aonaba ni bane ba E kamaiura lesu!!!



Reitan E Wetea Arau Iesu — Ana Baintangira ao Ana Karea Te Uea ae Boiarara!!

Maryanne Mikaere Namakin, St Padre Pio, Suva

I kan tabekarake banau n neboa Te Uea n ana Tangira nakoira ngaira ni kabane, ao ibukin ana karea are E anganganiira n tatabemaniira nako...Ko raba Te Uea n am karikibai aika a rangi tamaroa.

Ngai temanna ae I rangi n kakaitau ao man kakoaua aron maakan ao mimitongin ana Tangira Te Uea n ana makuri aika a rangi n maiti aika I aki kona n kababarai ni wanawanau n aron kororaoi ana Tangira ma ana aksi nakoira ngaira natina aika ti kekeiaki ribuakon rawawatan te meau aei.

Nna karakina aron au namakin nte nakoae e anganai Te Uea ae moan te kakawaki ae ana tangira te tina ma natina. Ni moan otintaa n te ririki 1999 ao e kakukurei Te Uea ma kain abau n anganira ara moan natu te mane ae arana Barry, ba tibangara ao kaotan tangirara Irouna. I bungia natu aio ao e aki nakoraoi marurungina ao ti tiku inanon teuana te wiki n te oo i Nawnerewere. E aki koro teniu ara wilki imwin otinakora ao ti a mananga nako Biti (Fiji) ba ti na reirei n te USP. Ngke e koro nimaua ana namakaina ao e baka naba n aoraki natu aei, ba te meningitis (aorakin te atu) ae rangi n korakora ike e a rawata iai ana kanganga natu aei, ba e katikitiki, te kabuehue ae korakora, te bekakanoko (e a kan bane ranin rabatana - e na kanga te ran ae e tii), ao e a kerikaki marurungin rabatana. N rinra aio ao e a matata raoi aorakin natu ae aorakin te buro. Bon aua aorakin burona ke ana kanganga burona, ba e bangabanga te oo are e i nuka raoi (dividing the left and right side of his heart), e bangabanga te valve ke bonotan kawain te rara are inanon burona; e a bubura iteran burona are te angatai (enlarging his whole heart); ao e kaibibiti baibun kawain burona are birinakon rabatana ni kabuta te rara (override of blood vessels). E ataaki n arana ae Tetralogy of Fallot.

Natiu aio e rangi n marurung rabatana, ti tebo ma akea ana kanganga ao tarana bon raoiroi naba inanon uarerekena. Ti rangi ni maan n te onaoraki tao te namakaina tabun, ao ti a manga otinako, ao ti a manga riin ba e a manga roko naba, bon ti uoua riinra are kabaneana ao e katikitiki ao e mate iterana are te angatai. N aron ana taeka ana taokita ao e taku ba e nanououa ba e na kona n reke maeun iterana are mate ke e na aki ba are bon te buroo ngaia, ma te bai ae e riki e a manga maeu naba. Inanon au tai ma ngaia n te oo ao ngai e rangi n kananokawaki te aonnaba aio irou, akea noran tamaroan te bong teuana ma teuana, ba I rangi n rawawata n te bong ae koraki ibukin noran marakina, kainnanona ao korakaina ao tangina n te aoa ae koraki inanon te maan ae kan uoua te namakaina. Ao kainanou n iangoa ae ai maitira aomata ao e a reke naba natu ae batia ana kanganga. Kainnabau e rangi n rarawata naba ma

tiaki ai arou ae I bon nora aron rawawatan natiu aio (raou n te oo). Ngkanne e a reke ae e a marurung ao ti a otinako ao ti kantaningaaki ba ti na oki ngkana e roko te tiim n buroo ba e na noraki. Ngke e a roko te tiim ao e nang bon koreaki ao a manga bon taua taokita n kabanea riki aia iango iai ao n tokina a karautaeka nakoirba aikoa kona n koreia ba are e bon rangi ni kanganga/ complicated ana case ao e raoiroi riki ae reke riki ara tai ma ngaia nakon ae ngkana e koreaki ao e a toki naba ikanne ngkana e aki nakoraoi mwin te korokoro. A taekinna ba e na aki koro tebwina ana ririki ni maeu. I aki kona n maninga aia taeka ae kangai “take him and enjoy him until the day he will leave” e rangi n matoatoa te rongorongo aio irou ma kainnabau ao e rangi ni kamaraki.....ngaia n are ti a karaoa aron ara kabanea n tamaroa ibukin kakukureiana ao nanoangaaeana ae moan te korakora...ao ngkanne man te tai anne ao e a bon titiku naba n au iango ae n te taina ao e na bua natiu aio ao ikanne are I a moana naba anua ae I rangi n kakabanea au iango n te botaki ae te mate ke noran aia kanganga aomata aika a rawawata ibukin aia aoraki.



Te bai ae riki I rangi n kakabanea au iango irouia ana utu te mate (ngkana iai ae mate), I taraia ao e kanga aron tangiia ao tera ae a karaoia inanon te tai anne. I tabe n riki ana koraki te gaia n aron tinan te n te mate, kanga te tiaki te botaki ae I (photos) I karauai n are e nang rotaki ba ng. E roko irou are i ke n taetae, ke e n ana kanganga aio? kin naba tao katau nnga roko naba iai. I rei.

kakamatebaia aron te mate riki ana korakite mate are e rangi n kaan mangaia n aron tinan te mate ke buun te mate, taman te mate, kanga te aekaki anne. E ngae ngkana tiaki te botaki ae I noria iai ao te tamnei (pictures/photos) I karauai n tara raoi te aomata are ngaia are e nang rotaki ba e kanga teina ao arona n tang. E roko irou are kangai, e kona n kakamakuri ke n taetae, ke e kona n manga move on I mwin ana kanganga aio? Aekaki n titiraki aika a rio ibukin naba tao katau-raoau imain te tai ae Nna manga roko naba iai. I bon biririmoa n taraii nte tai arei.

Ara kauoua n okira te aba ae Biti ni moan 2008 ao Barry ai ruaiwa ana ririki ni maeu, e a manga roko naba aorakina n July ae te maraki n atu ao e a rangi n korakora ao tiaki toki n rin te oo n aoraki, e aki reke buokana ao tia kaotinakoaki n kabanean rinna bwa e aki reke buokana. Moan te kananokawaki ao ni kamaraki ba ti a anganaki te taeka ae kangai "kam a riai n kakaraure ma ngaia bwa e nang nako tao inanon tabeua te aoa ke te bong".....ti kaotinakoaki n 5 September 2008 ao Barry e a aki kammakuri (comatose stage) ai te matu irouna n aki namakina naba. N te moanibong n 29 th September 2008 (Aia Feast Day tenan Archangels Kabairiera, Rabaere ao Mikaere), tao nakon te aoa nimaua n te karangaina ti a uti ba ti a nakon Barry ba e a kati-tika baina ao e ngirangira (korakai). Ti karuoia man te kainiwene are wewene iai ba ti na riringa ngai

ma kainabau, ti kawenea I nukara ao ti tekateka i rarikina, ngai n iterana ao raou arei n iterana are teuana, ba ti a tabe n iangoa arona. Inanon kume-kumeana ao ea toki naba ikena iai...inanon baira. I rangi n rawa ke tao I nano maroa n nora tokin ikena, e reke irou are I a ti kan kaongoaki naba, ma ngaia tao e bon tangiria ao bon nanon natira aio ba ngai ma tamana ti na bon nora nakona...

I a baraki n tang ma te kamimi ba I tangao i aki maraki (ti tabo I karioa tangiu – te moment are I a kaman iaiaangoia ba tera arou iai), a roko tangai a ma Uriam ma Atuna n raonira nteaoa anne ao n karaua nanora ao ti tataro ma ai te kamimi bwa I a bon tang n akeau namakin ni kainnano. Ngke e toki tangiu anne ao ai anne naba tangiu (ake n nikirana e a ti ranran naba matau) ni karokoa te tai are ti a nako Tarawa n kawenea rabatana, n te kaabong. Ngkanne e a bon bua tangiu ao I a manga bon kakaea tangiu ke tao I a mimi ba tera ae e a riki irou. Ngkanne ngke ti nang roko i Tarawa man te wanikiba ao I a manga taku ai manga te nanokawaki ngkai ngkana ti kaitibo - e tei nangina. Te kamimi ngke ti kaitibo ma ara koraki n te marae ao ni karokoarokora nte auti ao bon akeau naba te kan tang irou (n aron iangoana irou are tao Nna iakiaki ke ntatakarua). I manga bon taku tao I a babakaine ba e aera nkai I aki tang. E taunaki Barry n te Kaonobong 4 n Okitoba, I tei i etana ao e wanako ranin matau ba e a bon kitaniira raoi. Ngkanne bon te rangi n mimi ngai, ngkanne inanon tikura i Tarawan taninga kibara n oki nako Biti, ba ngkana I matu n ara auti ao I aki toki n uti nte karangaina koraki bwa I kan noria ao I kakaea uringana n aron kunana ke ana tunes are e aki toki n aneneia ba I aonga n namakinna ao n uringa iai ma e a bon rangi n kamimi ba I aki naba kona n uringa te tune are e kakaraoia. I kataia n katea ubuna i matau ma e aki kona n tei bon te maninga ngai arona ao ubuna e aki kona n oki uringana. E a reke ba tabeaiangau ao I a share ke tibaja nakon kainabau te bai ae riki ao ngke e kaekai ao bon kaekan raoi au tabeaianga ae kangai, ‘ai kabaiara ngkoe ba erokana am namakin, am ururing ao tangim Te Uea B ataia ba ngkoe ae kona bon moan rotaki batinina ngkoe’.

E uki au iango ao I taku 'Ko raba Te Uea ba Ko nora au katauraoi inanon ruaia te ririki imain te tai aio ao ko ataia ba Nna bon rangi n kainnano ngkana e roko te tai aio, ao ko anai rawawatau man buoka marakiu ni kabane n aki katuka teutana ao Ko a manga anganai natiu ae uarereke ba e na toroba nanou ke n kanoa te marena ao te reitaki are I marenau ma natiu are au karimoa ao ti natiu te m'an'e'. I aki kona n maninga ana tangira ma ana akoi Te Uea rinanon natiu ae te karea ae boiarara, TEM BARRY!!

E a riki Barry ba temanna ara SANTO ae e maeu ni koaua irarikira n te onimaki ae ti kekei-aki inanona ni irira nanon te Uea ni baai ni kabane ibukin kakoroan raoi katongan karawa ikai iaon te aba.



*'I a baraki n tang ma
te kamimi ba I tang ao
I aki maraki (ti tabo I
karioa tangiu....."*



"Imuin te katokabai ao e a bara te botaki ao i nanon okira ao I a namakinna ba iai te ang ae bou....."

E Ringai te Uea ni Katoka Aoraki

Beretika Tiim, Betio

Mauri tariu ma maneu n ana tangira Te Uea!!!

Au taeka ae Nna moan taekinna ai bon au karabaraba nakoia maneu ma tariu ake a tia ni buokai man aia tai ni katokabai iaou n au tai n aoraki are I a tia n uouotia i nanon te maan ae teuana tabun te ririki. I kua n nakon te onaoraki ao akea au bai n aoraki ba ti te batin. E bon aki reke naba buokau iai ao inanon te tai n tataro n te Tabati teuana ao I a ongo naba ae te tataro n te Charismatic ao I a tiku n taninga bona. Inanon te tai n tataro ao ea nako te tataro n ianena ao n te tai anne I a kabanea au bubuti ba e na taiaoka ni buokai IESU n ana baintangira ake E a tia anganai. E bia nanoangai n anai ana baintangira ae te aoraki ba I a bon rotaki iai ma I kantanninga are mai rouna ao I butia naba lesu ba E bia anai marakiu ni boti ma marakina ao kaikeukeu n ikotia naba ma ikeikena ao E a taiaoka ni ikoti ni kaki ian ana kaibangaki.



Tebongina i muina ao I a manga boo ma tariu ao maneu inanon naba ana tangira Te Uea ao a tuangai ba Nna kaea te botaki n tataro ba e na boo te katokabai iaou n tarikin te Katenibong. I a kataia ni keaki ni mananga ao are I kainnano ba I moti niike. I nanon manangau ao I a tuangaki bwa e bo n aia auti Riwata. Inanon te waaki ao e a nako te tataro, e tia ao e a waki te katokabai iaou. Imuin te katokabai ao e a bara te botaki ao i nanon okira ao I a namakinna ba iai te ang ae bou ao I a namakinna naba ba iai teutana te bitaki ma I a boni karabaraba riki nakon te Uea ao ai tariu ma maneu ake a tia ni buokai inanon au tai n rawawata.

Kam batin raba ao te Uea i marenara ntaai nako. Ana Raoi ao ana Tangira Te Uea i aora ni bane. Kam na bane ni kabai i nanon ana tangira lesu ma tinana ao tinara Nei Maria.



E Kanenea au Onimaki Te Uea

Nei Delli Arthur, St Padre Pio, Suva

Mauri tariu ma maneu n ana Tangira te Uea. Imain ae I waaki nako ao I a kan rimoa ni kamatatai moa nakoimi tariu ma maneu n ana Tangira te Uea. Ngai bon kain te aro ae Wetire (Wesley ke te Kamatu) ao kainabau bon te Katorika.

Ni moan irirakin te botaki ni charismatic n te Katorika ao bon akea kakouan Nei Maria irou kiolina ba akea n te onimaki n Wetire nakon Nei Maria. Inanon irirakin te botaki aei, tao inanon te kauoua ni wiki ao e roko teuana te mi ae kamimi mani kakukurei are a tiba reke inanon maiu. I mi ba I neboneyo n te Hall i Rabi ao inanon au tai n neboneyo ao I a ongo banai aomata ae a kangai, "E nang ruo lesu mai Karawa, ao a roko kain Buakonikai, Tabiang, Uma ao kain Tabwewa". Ao iai ae manga takarua ni kangai, "E a ruo lesu". I a kaurea naba matau ao I a noria kain te Charismatic mai Suva. Ao I titirakina Nei Tenikarawa ake kain te botaki n charismatic mai Suva," kam roko ningai?" E kaekai Nei Tenikarawa, "Ti roko ba ti na kaea ruon lesu". Ti bane n nako aan te baranta ngaira ma kain te Charismatic ni kabane ao ti a tatanninga. Ngaira kain te Charismatic ti mena n te Hall teuana ae kaitaran te Hall are teuana kanga n aron ae korotamneiaki inano.



Ao ngke E a ruo lesu ao te ota e i rabuna te tabo aei, ao ngke e a moanna ni kakan ao e a bae ni uauarereke te ota ni karokoa ae e a roko inano ao lesu E tei iaon te ota ae teina bon te kabang. Ao E arora baina lesu mani kotea te Hall are ti tei iai (kain te charismatic). Ao temanna te aomata e biri n otinako ao e koteia nakoni lesu ao lesu E ioioa atuna ao imuina e a manga kaoti Uriam i matan lesu ao e koteia ao lesu E katoua atuna. Ti a bane naba n ira Uriam nakon lesu ao ti bane n taua bain lesu ao ti a waerake naba nako Karawa ma lesu. N tai anne ao akea kinakin Uriam irou ba I a tiba roroko n te botaki ni charismatic. I a tibaia imuina ma Uriam ao ikanne are I a moanna ni kina ao n rena ma kain te botaki aei.

Mai ikai naba are e boni matoa nanou ni kan Katorika ao I a bon babetioaki ao ni moana au course are te Maiu ae Onraken te Maiu ni karokoa ae I a bon kainaomataki n Novemba n te ririki ae nako. Kain ara course n te ririki ae nako ai bon tangara, tangai lan Namakin, tangai Katang, tangai Mikaere, Martin Pine ao ai Kinarerei. Inanon wakin ara course ao ti namakina rikiraken te itangitangiri i marenara ma kain ara course ao iai naba kunara ae ti bane n oteia ma Uriam ibukin te kainaomata ae

kateke nano ngkana ko ongo ba e kangai taekana:

"AIO NGAI TE UEA I KAUKA NANOU NAKOIM
NANOANGAI AO KAMAUNAI BUREU
ANGANAI TE KORAKORA N TE ONIMAKI
KAONAI N AM TANGIRA AE AKEA TIANA
Chorus: I A TABEKI BAIU N NEBOA ARAM AE TABU
I KATITUARAOIKO AU UEA IESU (IESU)
I A TABEKI BAIU N NEBOA ARAM AE TABU
I KATITUARAOIKO AU UEA IESU...
I TAROMAURIKO AU UEA IESU...
KATEIMATOAI N AM TANGIRA IESU"

I bon kakoaua ae e a moanna ni mamakuri te Tamnei ae Raioroi irou. Ao I rangi ni kekeiaki ba e na aki baka rorokou n te botaki ba e a moanna ni kamaiu irou.

Ma e boni ngae ngke I irira te botaki ma bon akea au onimaki iroun Nei Maria ba ti lesu. Ni karokoa ae n teuana te karangaina ao e a manga roko naba te mi teuana ae e a kamimi riki mani kakubanako. I a mii ni karaigainan te Kanimabong 19 Tun ba aongkoa ti nang nako n Tutia, ngai ma kainabau. Ao I nora Nei Maria ae uoua rabatana aika a kaitara; teuana n te iterana ao teuana n are n iterana. Ngke ti nang nako n Tutia ao raou aei e a takinii baina nakon rabatan Nei Maria are teuana ao I a nora naba te ota ae otinako mairoun Nei Maria ao ni bakarerea baban (ana chest) raou aei ao man babaana ao e a otanako nakon rabatan Nei Maria are teuana n te aro are kanga a kauntaba taian ota aikai ao e a riki ba te ota ae e bubura. Ao man te ota aio ao I a nora te baonikarea ae tei ao e a ababaki ao uoman aomata aika a tei i aona. Ao i nano iaan te baonikarea I a noria aomata aika a batia aika a tanginiwenei ao akea kuniikaia. A bon taonaki n te korakai ni maraki aomata aikai ao a tabe n tang ni kainnanoa buokaia. Titebo tarakia ma aomata aika a kabuekaki n te ai ae moan te kabuehue n te tabo ae akea te ang iai. Ao ngke I manga tara te baonikarea ao I nora Nei Maria ma lesu aika a tabe ni korona, Nei Maria e katorobubua ao e taua te korona ao lesu e booti baina ao e taua naba te korona.

Ngke I a uti ao I a tang ba e a roko irou te nanoanga ibukia aomata aikekei. A nako nanoia kain au auti ba a taku ba ti uun ibukin aron banau are I tatakarua iai n tang. E taku raou aei ba ti na wetea Uriam ao ngai I a kaenga. E tarebonia Uriam ao e a roko naba Uriam imuin te itera n aoa. Ngke e kaelei Uriam ao ngai I kataia n taetae nakoina ma ranin matau aika a bon wawanako ba ti tebo irou ba e kai nanou ni iangoa aroia aomata ake I noria ni maraki ba ai antai ngai aoi ai tera aroia n tiku ni kawa inanon te kainnano ao ni maraki. Ao i muina ti a neboneyo naba ma Uriam ao e a kanakoa naba te kuna are "**I aon te kaibangaki I nora au tia Kamaiu**". Ngke e a aneneaki ao I a bon namakina korakoran riki te uruaki n nano ma te nanoanga. Are a bon waanako naba ranin matau ao titebo ma I nora lesu ngke E tine n te kaibangaki. Matau a bon tibutibu n te moaningabong anne n te kainnano ae e reke irou n te tai anne. Ao I karaba te Uea ba E anganai te karea aio ae te "MII".

I karaba te Uea n ana rongorongo nakoui n tem ii aio ba E kaotia iai ba Nei Maria bon te aine ae kakannato ba tinan lesu ae ara tia kamaiu



ao tinara naba. Ngkai I a bon tiba kakoaua Nei Maria ba ngaia te aine ae kakannato mai buakoia aine ae akea kobotauaan raiorina ibuakoia aine.

N te namakaina ae Aokati ao I a kabeabeani iroun te Uea ba Nna taibina te boki are "Irian te Boki" ae Te Maiu ae Onrake n Te Maiu. Ao ngai mai buakoia taan taibi akanne ae I aki kakoroa nanon te Uea ba e aki tia au boki. I a manga anganaki naba te boki arei ao I a iangoia ba e na kanga n tia ngkai akeau atatai n te taibi. I tataroakinna n te tai naba anne ngke I oki man n ara charismatic ao ngke I a taibi ao e buti nako baiu n taibi n airon te aomata ae moan bakuaku. I a nako ni matu ao I kakaitau nakon te Uea ba I ataia ba E tia ni buokai n au kanganga ae I rinona. Inanon matu ao e a manga roko naba te mi, ao I a mi ba I taibi ma I kainai inanon te ru. Ao iai ae e a karebwerebwe naba, ma korakorakor are e nang tabeaianga nanou n aron tian au boki ba I anganaki uoua te bong ba Nna kabanea iai, ngaia are I rawa kauka au mataroa ba I rawa ni katabetabeaki. E bon aki te karebwerebwe ao ngke I a kaukia ao bon te tounako ao te takarua irou ke I nora Barry ae natin lan ma Maranne ba e tei n te mataroa. Ao I rang maku ba I ataia ba e a tia ni mate. E rin ao e kangi "anne am korona ae Nna anganiko ba ko na mba(kiss) ma te kaibangaki ba ngaira tia tia n start". Ao e a taonnako naba. Ao ngke I tara muina ao I nora te ota ao Barry ae e ua korona nako moa n airon te ua karea. Ao ngke e roko i moa ao e a kaira te korona mai bukon te mirion n aomata. I titiraki irou ba ai maia naba ae e a rineki te Anera ae ten Barry ba e na kaira te korona i bukon te maiti n aomata arei.

I karaba iai te Uea ba E kaota ana Anera nakoui are ngai aei e na buokai n au taibi. Ngke I a uti ao I karaoa au tataro ni karaba mani katituaraoa te Uea n te mi arei ao I a nako naba n taibinna au boki arei. Ai bon te kamimi ba e bane tinanon aua (4) te aoa. I rang ni karaba te Uea iroun ana Anera ae tem Barry are e anganai te korona ba korakorakor ibukin katian te boki.

Au Karabaraba nakoin ana botaki lesu ae E a tia n karinai iai ba ngke arona ba akea aotao ao e na teimatoa arou ma rimoa ae I buakaka. E raba te Uea ba ngkai I a rin n te botaki aio are Saint Padre Pio ao I a tabe ni kekeiakia te maiu ni Kiritian inanon ana Tangira te Uea. I karaba naba Uriam n ana tangira ni mannanoira ni kaonoira nakon te botaki ba ngke e aki kakaungaire a I taku ba ti na reke ba ataei ngaira aika a na tiotio nako n aki kina te Uea.

I karabako te Uea, I neboneyo te Uea n taai nako. Am bai nanou. Anganai te kekeiaki ao te kakorakoraki ao te teimatoa inanon maiu. Amen.

Kam raba Tariu ma Maneu n ana Tangira te Uea ao ana Raoi te Uea iroumi ao ioura n taai nako.



"I karabako te Uea, I neboneyo te Uea n taai nako. Am bai nanou....."



Kakaeakin Iesu Inanon Maiura Aritita Tekaieti, St Padre Pio, Suva



Maiura ngaira I Kiribati ngkana ti moan roko n te tabo teuana bon kakaeān te mam bwa e na reke ia? N tain te waaki ni kainaōmata ao iai iterana ae kabanean tabeua te miniti ni kakaea raoi nanon ana tangira te UEA iroun temanna ma temanna. I teitei itinanikun te Umantabu n aia tabo kain te MSC inanon te waaki ni kainaōmata e aki rereke iangoana irou ao e kakubai te iango are e kareai bwa kanga ai aron iangoan ae I a kakaea te mam I Kiribati. Ko na kanga ni kakaea te mam? Bon man kenakin aontano ae matoatoa arona ni ua ae ko roko n te ran. Ngkana e tarika ao are ko na manga moana riki am keniken n te tabo teuana ibukin kakaeān riki te mam ni ua e bon reke iroum.



Inanon maiu aio ao kakaeān Iesu inanon maiu ai bon aron kakaeān te mam. Te mam anne ngkana e reke iroum ao ko na bon kaonrakeaki iai bwa ko kona n ni moi iai ao e a bon kona n riki bwa kanga ai aron am koburake n ran ae ti ngaia maium taainako. E kona

ni kaitiakiko man barekan aonteaba ao man kona ni katokii riki kainanom aika a batī.

I bon ikawai rake n te reireiaki te tataro ao taekan IESU inanon uarereku mai irouia ara karo, n au tabo n reirei ni kuura, ao are I taku bwa I ata IESU ma ngaia bon tiaki raoi ngaia anne ao e a bon rotai te TAKA iai. I a tibwa ataia raoi bwa ngaia ***Lata IESU ma I a tia n aki kina raoi.*** I a kukurei n tibwaia ma ngkami tariu ma maneū bwa e rangi ni kaokoro ae ko ata IESU ao ae ko bon kina raoi. E matoatoa ma ngkana e reke iroum ao ai aron reken te koburake n ran ke te mam ioura ngaira I Kiribati ni maiura, ae tauraoi irarikim n taai nako.

Tarimi ao manemi




*"I a kukurei n tibwaia
ma ngkami tariu ma
maneu bwa e rangi ni
kaokoro ae ko ata
IESU ao ae ko bon
kina raoi"*

Te Kawai Nakon te Maiu ae Tabu

A Kakawaki Tama?

Nei Beneteta, St Padre Pio, Suva.



Kam na Mauri Tariu ao mwaneu inanon Kristo.

Ana bai n tangira nakoiria Iesu n te tai aio bon ara Tama ba e a tia ni kaburea te ririki aio te Pope ibukiia. Tera raoi ae ti na kona ni karaoia ibukiia Taama n te ririki aio?

Ni warekan ana kaongora te Ebikobo temanna ibukiia Tama man te tabo ae arana Palencia i Spain n ZENIT ao e reke nanou ba N na kabonganai ana titiraki tabeua ibukira ba ti aonga ni kona n tiroi nanora ibukiia ara Tama.

A bia riki titiraki aikai ba kairan nanora n tangiriia riki ara Tama ao man tauraoi ni boutokaiia n ara buoka, n ara tangira, n ara makuri ao ai n ara tataro.

Ke a tauraoi nanora n atonga aei ibukiia ara Tama- A KAKAWAKI ARA TAMA!

Man titiraki aikai ao ti na kona n ataia ba a

kanga aron nanora ibukiia ara Tama. Kaekai ma nanom ae ngkai ao nooria ba ko mena ia n am reke.

1. Ko a tia n tatataro ibukiia Taama, te Ebikobo ao te Pope inanon taai aikai?

- I aki atai aria.
- I ataiia ba e bon tatataro te aba ibukiia n tain te Tutia. I a reitai naba iai.
- I tatataro ibukiia ni katoa bong riki n au tebuī ma nimaua ni miniti ke n au tai ni korona.

2. Ko onimakina am Tama ba e kona ni buokiko n am kanganga?

- Are ti bon bane n iai ara kanganga nako.
- A kabebetea te rawawata maata ao iango aika a batī! E bon raoiroi riki butimaeān te buoka mai iroun temanna riki.
- I kunea ba a na buoka te Tama nakoiu ae moan te kakawaki bon n te tai are e kabarai au bure n au tai ni benetenia.

3. Ngkana I ongo kabuakakaan te Tama irouia raraou...

- Ao I a tomaia naba, ba are I ata te rongorongo ao mwina a taku ba I kan raoiroi.
- I katukuia ao I baka n iangoi baai tbeua.
- I karaurau n atonga teuana 'Ko na mauri Maria'.

4. Rinanoia Taama ao I noora...

- Te bai ae e aikoa bainaki ngkai. Kanga irou ao a rangi ni 'backward'!
- Ae a aki taua ma nanoia n nakoia.
- Ana Mitinare te Atua; ae e onea mwiin Kristo ibuakora.

5. Ai iraua am tai ni kakaoa te Tama nakon mwengam?

- Ti ti kaoa ngkana iai ara mate ni mwengara.
- E roroko ba e ninikira ana komonio tibura te unaine.
- N tabetai. Ti rangi n unga n ongongora irouna ana karaki ibukin arona ni kaeka weteana iroun te Uea.

6. Ngkana ko ongora n ana kabarabara te Tama...

- I ti ongora ba Nna noria ba e rabakau n taetae ke e aki.
- I ongora ba e kakaongora ana kabarabara ke e aki ngkana e aki ao I aikoa naba kubara ana kabarabara.
- I ongora ba I nooria ba e kabongana te Uea n taetae rirouna.

7. N tain te karemangko ibukiia Tama...

- Ao e un nanou ba I noria ba akea wareia ba ai te bubuti naba.
- I bon taku inanou ' ai manga teuana riki te kabane mane'.
- I kariaia ba I noora kananoangaia ba ai tera boon maeuia ma buokan kabutan te Ekaretia.

8. Ngkana I ira ana Tutia te Tama ae e a kara...

- Ao I taku inanou 'a! e kaunga ba e e na waekoa ni bara'.
- I iangoia ba a karako ataein mane aika a ongo weteaia nakon te nakoa.
- I katituaraoi ibukin kawakinana inanon te nakoa.

9. Ngkana I manga noora te Tama ae e ataei ni karoaa te Tutia ao...

- I raraoma ba tera ae e na taekinna.
- I taratara te bai ae e karoia man katauraoa au reke ibukina ba N na taekinna imwuin te Tutia nakoia raou.
- I karaba te Uea ibukin nakoana ao I tataro ibukin kawakinana.

10. Ana tera am kaeka ngkana e tuangngko natim ba e kan riki n Tama ngkana e ikawai?

- I takuia man taku 'ko baba?'
- I tuangnga ba ti a maninga taekana man nooria n tairake.
- I tuangnga ba e na iangoia raoi ma e raoiroi ae e iangoa moa ana beebea n te

kura ae e rietata.

11. Ko a tia ni kakaunga iangoan te kan nakoa n Tama irouia ataein ni mane?

- Kanga I aki kan tabekia ba I bon katuka te aomata ma ana iango.
- Irou makuri nako a bon riai ni butimwaeaki e ngae ngke a kakaokoro.
- Eng, iai ae I a tia n iangoia ba n na taetae nakoina ibukina ma I tataroakinnna moa ba I aonga ni kawaria n te tai teuana.


Noora mwiin am bui. Ngkana e rawata

riki (a) n am reke ao I bon mimi ba e kanga n reke au titiraki aikai iroum ma I karaba te Uea ngkai e reke iroum ba e a karekeia naba au tai n reitaki ma ngkoe man tiba ana tangira te Uea nakoim ao man tuangko ba e tangiriko te Uea n aron ae e tangiria naba ara Tama. I bon kan tibaia naba nakoim ba e a tia ni kantaninga te tangira n am kaeka te Uea.

Ngkana e maiti riki te (b) n am reke ao I kan tibaia ma ngkoe ba ko tuai rangi n nora te kakabaia ae e anganiko te Uea rirouia Taama. I reitai ma ngkoe n tataro riki ibukin te karatia ae te tangira ibukiia ara Tama.

Ao ngkana angin am reke (c) ao I a buitiiko reitaanako am tataro ibukin katabuan aia makuri ara Tama ao kakabaiakiia inanon aia tai ni beku ibukin kabutan te onimaki ao ko bia katababa am bubuti ibukin weteaia ara roro ae e rikirake n nakon te nakoa ae e tabu riki nakon te nakoa n Tama ba I ataia ae e na bon kan ongora n am tataro ao am bubuti te Uea ae e onrake n te tangira ae e aki inanonano.

Ke e raoiniira te Uea ibukin boutokakia ara Tama, ara Ebikobo ao Tamara te Pope aika a karineaki iroura. Au tataro ma ngkami nakon Atinbanin lesu ae moan te tabu ba ti bia kona n kakaua ao man kaotia n arora ni butimaiia Taama ba bon ngaia Ana tangira Atinbanin lesu aika moanbaan te kakawaki ni katongan Karawa ikai iaon te aba.



*"Ke e raoiniira te Uea
ibukin boutokakia ara
Tama, ara Ebikobo ao
Tamara te
Pope"*